

Ringgit kukuh susulan KDNK meningkat - Anwar

KUALA LUMPUR: Prestasi Keluaran Dalam Negara Kasar (KDNK) suku pertama 2024 yang memberangsangkan mendorong kepada pengukuhan ringgit, kata Perdana Menteri Datuk Seri Anwar Ibrahim.

Pada 9 pagi semalam, ringgit terus mengukuh kepada 4.6900/6950 berbanding dolar AS, naik daripada 4.6940/6990 pada Isnin.

Pada pukul 5 petang hari sama, ringgit terus positif apabila ditutup pada 4.6940/4.6990 berbanding dolar AS.

Dari awal tahun sehingga kini, mata wang negara pernah ditutup paling lemah pada 20 dan 21 Februari kepada 4.7950/4.8000 berbanding dolar AS.

Anwar berkata, kerajaan bersyukur kerana ringgit semakin mengukuh dengan pengumuman ekonomi negara yang berkembang pada kadar yang lebih tinggi pada suku pertama 2024.

“(Ringgit pada paras RM4.69 pagi ini) adalah baik. Angka tersebut mengukuh dan secara

umumnya baik.

“Alhamdulillah, ekonomi kita baik pada suku pertama,” katanya kepada pemberita selepas merasmikan Forum Global mengenai Ekonomi dan Kewangan Islam (GFIEF) semalam.

Ekonomi Malaysia berkembang pada kadar lebih tinggi sebanyak 4.2 peratus pada suku pertama 2024 berbanding 2.9 peratus pada suku keempat 2023, didorong oleh perbelanjaan swasta yang lebih kukuh dan pertumbuhan eksport yang positif.



RINGGIT terus mencatatkan pengukuhan hingga mencapai 4.69 semalam, berbanding sekitar 4.71 pada minggu lalu.